



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მსოფლიო ბანკი

მსოფლიო ბანკი, მსოფლიო ბანკის ჯგუფი (World Bank Group), საერთაშორისო საფინანსო ორგანიზაცია. მოიცავს სხვადასხვა დროს შექმნილ ფუნქციურად, ორგანიზაციულად და ტერიტორიულად გაერთიანებულ 5 ორგანიზაციას. მათი საქმიანობის მიზანია განვითარებადი ქვეყნებისათვის ფინანს. და ტექ. დახმარება. **მ. ბ.** აერთიანებს 189 წევრ ქვეყანას და წარმომადგენლობები აქვს 130-ზე მეტ ქვეყანაში. მისი შტაბ-ბინა მდებარეობს ქ. ვაშინგტონში (აშშ).

თავდაპირველად **მ. ბ.** ასოცირდებოდა 1944 შექმნილ რეკონსტრუქციისა და განვითარების საერთაშ. ბანკთან (The International Bank for Reconstruction and Development – IBRD), რ-იც II მსოფლიო ომის შემდგომ ახორციელებდა ევრ. და იაპონიის მხარდაჭერას. მოგვიანებით, 1960, შეიქმნა განვითარების საერთაშ. ასოციაცია, რ-მაც იტვირთა ამ ბანკის პოლიტიკასთან დაკავშირებული ფუნქციების ნაწილი.

მ. ბ.-ის ჯგუფში შედის შემდეგი ორგანიზაციები: რეკონსტრუქციისა და განვითარების საერთაშ. ბანკი (International Bank for Reconstruction and Development – IBRD); განვითარების საერთაშ. ასოციაცია (International Development Association– IDA); საერთაშ. ფინანსური კორპორაცია (International Finance Corporation–IFC); საინვესტიციო გარანტიების მრავალმხრივი სააგენტო (Multilateral Investment Guarantee Agency – MIGA); საინვესტიციო დავების რეგულირების საერთაშორისო სააგენტო (International Centre for Settlement of Investment Disputes – ICSID).

მ. ბ.-ის. ჯგუფი მომხმარებელს სთავაზობს დაბალპროცენტულ, უპროცენტო სესხებს და გრანტებს, რ-ებიც გამოიყენება ინვესტირებისათვის ისეთ სფეროებში, როგორცაა

ჯანდაცვა, განათლება, სახელმწიფო მართვა, ფინანს. და კერძო სექტორის განვითარება, ინფრასტრუქტურა. **მ. ბ.**-ის ჯგუფი თანამშრომლობს ეროვნ. მთავრობებთან, კერძო სექტორთან, სამოქალაქო საზოგადოების ორგანიზაციებთან, განვითარების რეგიონულ ბანკებთან, კვლევით ცენტრებთან და სხვა საერთაშ. დაწესებულებებთან კლიმატის ცვლილების, კონფლიქტების მოგვარების, სურსათის უსაფრთხოების, განათლების, სოფლის მეურნეობის, ფინანს. და ვაჭრობის პრობლემების გადასაჭრელად და სხვ. ეს საქმიანობა ხელს უწყობს **მ. ბ.**-ის ჯგუფის ორი ურთიერთდაკავშირებული მიზნის მიღწევას – 2030-თვის აღმოიფხვრას უკიდურესი სიღარიბე და დაჩქარდეს ყველა ქვეყნის უღარიბესი (40%) მოსახლ. კეთილდღეობის უზრუნველყოფა.

საქართველო **მ. ბ.**-ის ჯგუფის წევრი გახდა 1992 წ. 7 აგვისტოს. მისი მუდმივი წარმომადგენლობა თბილისში გაიხსნა 1997. XX ს. 90-იანი წლებიდან თანამშრომლობა დაიწყო ინსტიტუციური მშენებლობის პროექტით, რ-საც მოჰყვა მთავრობის რეფორმირება საბაზრო მექანიზმებისა და კონტროლის დახვეწის მიზნით, აგრეთვე მაკროეკონომიკური სტაბილურობის ხელშეწყობა. 2004-იდან **მ. ბ.**-ის პროგრამა გათვლილი იყო სახელმწიფო სექტორის მართვისა და სოც. დაცვის სისტემის სრულყოფის მიზნებზე, კერძო სექტორის განვითარებასა და საქართვე., როგორც სატრანსპორტო კორიდორის, როლის გაძლიერებაზე. 2010-11-ში **მ. ბ.**-მა გაასამშაგა საქართვე. დაკრედიტების მოცულობა, 2010-14-ში ხელს უწყობდა საქართვე. რეგიონულ და ტურიზმის განვითარებას, სახელმწიფო მმართველობას, ჯანდაცვისა და განათლების სისტემის სრულყოფას, გზების მშენებლობას (2014-იდან). განახორციელა საქართვე. ინოვაციური ეკოსისტემის, საყოველთაო ზრდისა და კონკურენტუნარიანობის ამაღლების ხელშეწყობითი პროექტები. გარდა ინფრასტრუქტურული პროექტებისა, 2017-იდან სისტემატურად ხორციელდება დიაგნოსტიკა ქვეყნის მნიშვნელოვანი პრობლემებისა და შესაძლებლობების გამოვლენის მიზნით. მათ გადასაწყვეტად მუშავდება შესაბამისი დაფინანსების პროგრამები და საქართველოსთან თანამშრომლობის სტრატეგიები. 2021-იდან **მ. ბ.** საქართველოში ახორციელებს „მწვანე და მდგრადი საქართველოს“, მდგრადი სოფლის მეურნეობის, ირიგაციისა და მიწების, კახეთის სატრანსპორტო კავშირის განვითარების, ადამიანური კაპიტალისა და მიკრო-, მცირე და საშ. საწარმოების განვითარების პროექტებს.

ლიტ.: მ ე ს ხ ი ა ი., საერთაშორისო ფინანსები, თბ., 2012; A guide to the world Bank, Washington, DC: World Bank, 2011; T e n n e y S . , S a l d a A . C . , Historical Dictionaries of The World Bank, Bloomsbury pullishong, 2013.

ლ. ელიავა